



Consultaziun

tar la

**revisiun parziala da la lescha chantunala da taglia e da la lescha
davart las taglias communalas e davart las taglias da baselgia**

concernent la

imposiziun da taglia sin interpresas

Cuntegn

1	Situaziun da partenza.....	3
2	Concepziun dals documents da consultaziun.....	4
3	Puncts centrals dal PF17	4
3.1	Aspects dal dretg fiscal	4
3.2	Consequenzas per la gulivaziun da finanzas confederaziun-chantuns	5
3.3	Plans da realisaziun dals chantuns	5
4	Taglia sin il gudogn.....	6
4.1	En il chantun	6
4.2	En las vischnancas	7
4.3	Per las baselgias chantunalas.....	8
5	Realisaziun da prescripziuns federalas en il chantun	9
5.1	Retgavs da participaziuns decisivas.....	9
5.2	Taglia sin la facultad per patentas.....	10
5.3	Patent box.....	10
5.4	Deducziun supplementara da perscrutaziun e svilup.....	10
5.5	Deducziun per atgna finanziaziun.....	10
5.6	Distgargia maximala.....	11
5.7	Societads cun status spezial	11
5.8	Taglia sin il chapital.....	11
5.9	Imposiziun da taglia speziala suenter ch'il status fiscal è crudà davent	12
5.10	Supplements da famiglia e mesiras da la politica sociala	12
6	Midadas obligatoricas senza libertads creativas	12
7	Consequenzas finanzialas	13
7.1	Consequenzas per il chantun	13
7.2	Consequenzas finanzialas per las vischnancas.....	15
7.3	Consequenzas finanzialas per las baselgias chantunalas	16
8	Ulteriur proceder e plan da termins	16

1 Situaziun da partenza

Il 12 da favrer 2017 han il pievel ed ils chantuns refusà la refurma da l'imposiziun da taglia sin interpresas III (RTI III). Cun quest na dal suveran è s'augmentà il squitsch da remplazzar las societads da domicil, las societads da holding e las societads maschadadas, q.v.d. las uschenumnadas societads cun status spezial, che n'èn betg pli acceptadas sin plaun internaziunal. La confederaziun ha preschentà svelt in nov project – sut la designaziun project fiscal 17 ([Fehler! Linkreferenz ungültig.](#)¹) –, en il qual è vegnids surpigliads ils puncts essenzials da l'antieriura RTI III, è vegnidas stritgadas singulas mesiras ed è vegnids agiuntads ulteriurs puncts.

Il cussegl dals chantuns ha tractà il project durant la sessiun da stad e l'ha cumplettà cun ina part supplementara per la finanziaziun da la AVS. Questa cumplettaziun ha er chaschunà ina midada dal titel dal project da revisiun. Il project sa cloma actualmain lescha federala davart la refurma fiscala e davart la finanziaziun da la AVS ([STAF](#)). En quests documents da consultaziun vegn duvrà anc l'antieriur titel, enconuscent en la gronda part da la publicitad, PF17, perquai ch'ins na sa betg, sch'il cussegl naziunal vegn a sustegnair ils conclus dal cussegl dals chantuns.

Il PF17 è en in emprim pass in project da la confederaziun, cun il qual vegnan midadas la lescha federala davart la taglia federala directa (LTFD; CS [642.11](#)) e la lescha federala davart l'armonisaziun da la taglia directa dals chantuns e da las vischnancas (lescha d'armonisaziun da taglia; LATD; CS [642.14](#)). Il cussegl federal ha deliberà la missiva correspundenta il 21 da mars 2018 e l'ha publicada en il fegl uffizial federal dals 15 da matg 2018 ([missiva](#) e [text da lescha](#)).

La LATD è ina lescha generala che cuntegna disposiziuns obligatorias per ils chantuns, ch'il legislatur chantunal sto – en in segund pass – realisar en sia lescha da taglia. Savens ha il chantun fitg paucas libertads creativas. Quai na po betg vegnir crititgà ord vista da l'armonisaziun verticala da taglia tranter la confederaziun ed ils chantuns sco er ord vista da l'armonisaziun orizzontala da taglia tranter ils chantuns.

Sin fundament dal squitsch internaziunal d'abolir il status fiscal vegn premda ina via fitg svelta en la procedura da legislaziun. La confederaziun duai deliberar il project anc quest onn ed igl è previs da metter en vigur il PF17 per la taglia federala directa e sur la LATD per las leschas chantunales da taglia il 1. schaner 2020. Quest urari chaschuna ch'il PF17 sto vegnir realisà en ils chantuns parallelmain a la procedura da legislaziun en la confederaziun. Cun auters plets ston ils chantuns cumenzar a realisar ina lescha federala avant che quella è vegnida deliberada dal parlament federal. Quai ha per consequenza ch'il dretg federal che sto vegnir realisà, subescha anc midadas durant il process da legislaziun chantunal. Questas midadas ston alura vegnir surpigliadas en il dretg chantunal.

Il punct da partenza da quest project da consultaziun è la missiva dal cussegl federal. Il cussegl dals chantuns ha gia tractà il project e concludì per part midadas impurtantas (cf.

¹ Tar la confederaziun ha il PF17 il numer da fatschenta [18.031](#).

[communicaziun da la SDA](#) davart la debatta en il cussegl dals chantuns e [conclus](#) dal cussegl dals chantuns dals 7 da zercladur 2018). Questas midadas èn gia vegnidas integradas qua. Entant ch'ils documents da questa consultaziun vegnan preparads, vegn il PF17 tractà en las cumissiuns dal cussegl naziunal. Las tractativas respectivas na vegnan betg resguardadas en quest lieu.

2 Concepsziun dals documents da consultaziun

Il PF17 è per gronda part ina realisaziun da regulaziuns definitivadas da la lescha d'armonisaziun da taglia. Duas constellaziuns ston vegnir distinguidas. La LATD prescriba obligatoricamain in instrument ed il chantun po fixar la dimensiun da la mesira (Patent box) ubain la LATD metta a disposiziun ina mesira ed il chantun po decider, sch'el la vul insumma prender e quant auta che la distgargia duai alura esser (decisiun supplementara per custs da perscrutaziun e da svilup). Ils texts da lescha vegnan però normads definitivamain en la lescha d'armonisaziun da taglia e ston vegnir surpigliads tals e quals en il dretg chantunal.

Il process legislativ parallel ha per consequenza che texts da lescha en la LATD, che ston vegnir transferids en il dretg chantunal, pon anc midar. Per questa procedura da consultaziun avain nus perquai decidì da desister dals texts da lescha concrets. Las dumondas decisivas tematicamain e politicamain na duain betg vegnir discutadas a maun da texts da lescha malsegirs. Independentamain da quai n'ha il chantun strusch ina libertad d'agir per als concepir concretamain. La discussiun politica duai avair lieu a maun da tematicas, senza ch'i sajan gia avant maun ils detagls dals singuls artitgels da lescha.

3 Puncts centrals dal PF17

3.1 Aspects dal dretg fiscal

En il PF17 sa tracti principalmain d'abolir las regulaziuns per las societads actualas cun status spezial e da remplazzar quellas cun novas soluziuns acceptadas sin plaun internaziunal. Quai duai mantegnair la cumpetitivitad da la Svizra sco lieu fiscal e restabilir la segirezza giuridica. Quest proceder para stringentamain necessari ord dus puncts da vista. Per l'ina duain vegnir garantids ils retgavs da taglia da questas societads; en la confederaziun pajan ellas quasi la mesadad da las taglias sin il gudogn. Per l'autra ston vegnir prendidas mesiras per pudair mantegnair attractiva la Svizra sco piazza economica e pia er las piazas da lavur qualifitgadas en Svizra.

Il concept dal PF17 è vaira simpel. Las regulaziuns spezialas concernent l'imposiziun da la taglia sin il gudogn per las societads da domicil, per las societads da holding e per las societads maschadadas vegnan stritgadas en la LATD e pia scumandadas per ils chantuns. Abolidas vegnan er las regulaziuns praticas che n'èn betg impurtantas per il chantun Grischun e che pertutgan las societads principalas e la branscha da finanzas. Empè da questas regulaziuns duain esser pussaivlas reducziuns da taglia per exempel sur la Patent box e sur la promoziun fiscala da perscrutaziun e svilup. Ultra da quai vegn auzada la quota chantunala vi da la taglia federala directa dad actualmain 17,0 pertschient a 21,2 pertschient.

Cun ils retgavs supplementars che resultan da quai duain ils chantuns pudair reducir las taglias sin il gudogn per l'import ch'els considereschan sco necessari per lur atgna piazza economica.

3.2 Consequenzas per la gulivaziun da finanzas confederaziun-chantuns

Il PF17 ha er consequenzas impurtantas per la gulivaziun da las resursas en la gulivaziun da finanzas tranter la confederaziun ed ils chantuns (NGF). En il dretg vertent han las entradas suttamessas a la taglia da las persunas natiralas ed il gudogn suttamess a la taglia da las persunas giuridicas la medema paisa en la gulivaziun da las resursas. Mo ils gudogns da las societads cun status spezial vegnan reducids cun in uschenumnà factur beta ad ina dimensiun pli pitschna, perquai ch'ils chantuns na pon betg suttametter a la taglia quests gudogns u als pon suttametter a la taglia mo per ina part minimala. En il nov dretg vegni parti dal fatg ch'ils chantuns che han ina gronda quota da societads cun status spezial, vegnan a reducir las taglias sin il gudogn, per ch'els na perdian betg questas societads. Pervia da la concorrenza fiscala interchantunala vegn quai a sfurzar ils ulteriurs chantuns medemamain da reducir las taglias sin il gudogn. Sch'ins parta d'ina grevezza fiscala efectiva sin il gudogn² per la confederaziun, per il chantun, per la vischnanca e per la baselgia chantunala da 13 fin 15 pertschient, signifitga quai che la part per il chantun, per la vischnanca e per las baselgias chantunalas po importar anc circa 5,6 fin 7,8 pertschient. Tras quai n'è betg pli cumparegliabla la pussaivladad da prelevar taglias en la taglia sin las entradas (circa 20 pertschient per il chantun, per la vischnanca e per la plaiv) ed en la taglia sin il gudogn, uschia ch'ils dus geners da taglia na pon betg pli avair la medema paisa en il potenzial da resursas. La taglia sin il gudogn duai perquai vegnir resguardada cun in factur zeta che ha in'atezza da 50 pertschient u damain.

Per il chantun Grischun ha questa paisa main ferma da las taglias sin il gudogn il resultat dischillusiunant ch'ils pajaments supplementars ord la gulivaziun da las resursas vegnan a diminuir per circa 24 milliuns francs. Quest minus po vegnir cumpensà mo per part cun la part pli gronda da la taglia federala directa che cumpiglia circa 14 milliuns francs. I resta in minus da 10 milliuns francs che renda er nunpussaivel al chantun d'indemnizar las vischnancas per eventualas entradas pli pitschnas.

3.3 Plans da realisaziun dals chantuns

En la discussiun politica davart RTI III en la confederaziun èsi vegnì crititgà ch'il votant na possa betg savair, tge consequenzas ch'il project haja la finala, perquai che las mesiras da realisaziun dals chantuns na sajan betg enconuschentas. Per eliminar questa malsegirezza ha la confederaziun dumandà ils plans dals chantuns gia per concepir la missiva ed als ha preschentads en moda transparenta en la missiva dal cussegl federal. En questa fasa tempriva dal process legislativ sa tracti pir da las intenziuns dal departament cumpetent u da la regenza, che pon anc subir midadas en il process legislativ chantunal. Questas indicaziuns servan dentant sco indizis per giuditgar la cumpetitivitad dal lieu fiscal. Sch'ins

² La grevezza fiscala efectiva sin il gudogn mussa la taglia sin il gudogn che vegn imponida sin il gudogn avant che deducir las taglias.

spetgass fin ch'ils auters chantuns han prendì mesiras, arrivass la reduenziun posteriura da la grevezza fiscala eventualmain memia tard.

4 Taglia sin il gudogn

4.1 En il chantun

La grevezza fiscala sin il gudogn vegn cumparegliada a maun da la grevezza fiscala efectiva. I sa tracta d'ina grevezza fiscala da la confederaziun, dal chantun, da las vischnancas e da las baselgias resguardond il fatg che las taglias sin il gudogn pon vegnir deducidas en Svizra per eruir il gudogn suttamess a la taglia. Las tariffas da la taglia sin il gudogn ch'ils chantuns vulan cuntanscher pon vegnir resumadas qua sutvart (ordinadas tenor differents criteris).

Grevezza fiscala sin il gudogn dals chantuns (grevezza fiscala efectiva per tut las suveranitads a la chapitala chantunala)

ordinà tenor l'alfabet	oz	previs	posiziun	ordinà tenor grevezza oz		ordinà tenor grevezza prevista	
AG	18,61 %	18,17 %	1.	LU	12,32 %	SH	12,01 %
AR	13,04 %	13,04 %	2.	OW	12,66 %	ZG	12,09 %
AI	14,16 %	12,66 %	3.	NW	12,66 %	LU	12,32 %
BE	21,64 %	16,37 %	4.	AR	13,04 %	GL	12,43 %
BL	20,70 %	13,94 %	5.	AI	14,16 %	SZ	12,51 %
BS	22,18 %	13,04 %	6.	ZG	14,62 %	AI	12,66 %
FR	19,86 %	13,91 %	7.	UR	14,92 %	OW	12,66 %
GE	24,16 %	13,49 %	8.	SZ	15,19 %	NW	12,66 %
GL	15,70 %	12,43 %	9.	NE	15,61 %	UR	12,66 %
GR	16,12 %	14,02 %	10.	GL	15,70 %	AR	13,04 %
JU	20,66 %	17,48 %	11.	SH	15,82 %	BS	13,04 %
LU	12,32 %	12,32 %	12.	GR	16,12 %	SO	13,12 %
OW	12,66 %	12,66 %	13.	TG	16,43 %	TG	13,40 %
NE	15,61 %	13,79 %	14.	SG	17,40 %	GE	13,49 %
NW	12,66 %	12,66 %	15.	AG	18,61 %	NE	13,79 %
SG	17,40 %	15,20 %	16.	FR	19,86 %	FR	13,91 %

SH	15,82 %	12,01 %	17.	JU	20,66 %	BL	13,94 %
SO	21,38 %	13,12 %	18.	BL	20,70 %	VD	14,00 %
SZ	15,19 %	12,51 %	19.	TI	20,95 %	GR	14,02 %
TG	16,43 %	13,40 %	20.	ZH	21,15 %	SG	15,20 %
TI	20,95 %	17,01 %	21.	VD	21,37 %	VS	16,00 %
UR	14,92 %	12,66 %	22.	SO	21,38 %	BE	16,37 %
VD	21,37 %	14,00 %	23.	VS	21,56 %	TI	17,01 %
VS	21,56 %	16,00 %	24.	BE	21,64 %	JU	17,48 %
ZG	14,62 %	12,09 %	25.	BS	22,18 %	AG	18,17 %
ZH	21,15 %	18,19 %	26.	GE	24,16 %	ZH	18,19 %

Tenor las experienschas actualas crudass il chantun Grischun – cun ina grevezza fiscala efectiva da 16,12 pertschient – enavos da l'actuala posiziun 12 sin la posiziun 21. Per il departament da finanzas na statti betg en dumonda ch'il pegiurament da la cumpetitivitad en questa dimensiun faschess donn a la piazza economica. La finala perdess il Grischun interpresas, investiziuns, substrat fiscal e plazzas da lavur. Per quest motiv proponin nus da reducir la grevezza fiscala efectiva sin il gudogn a 14,02 pertschient. Questa finamira duai vegnir cuntanschida – sch'ils pes da taglia restan ils medems – uschia, che la tariffa da taglia dad actualmain 5,5 pertschient vegn reducida da nov a 4 pertschient.

La glista qua survar mussa bain ch'il chantun Grischun croda da la posiziun 12 sin la posiziun 19 er cun questa gronda distgargia fiscala. Las differenzas da la grevezza en il champ mesaun da la glista dals chantuns èn dentant minimalas e na dastgassan strusch esser decisivas per la decisiun da las interpresas da far investiziuns.

4.2 En las vischnancas

La reducziun da la grevezza fiscala sin il gudogn che vegn proponida, ha la finamira da mantegnair ina piazza economica cumpetitiva. Ma per quest intent na ston betg mo vegnir consideradas las taglias, mabain er differents auters factors sco funs che stat a disposiziun, forzas da lavur qualifitgadas, ina buna avertura, in access a l'internet effizient, la proximitad a scolass autas ed ina piazza aviatica intercontinentala. Questas premissas èn dadas mo en paucas regions dal Grischun. En blers auters lieus vegn la reducziun da la taglia sin il gudogn a restar senza effect, perquai ch'ils auters factors dal lieu na vegnan betg ademplids. Là chaschuna la reducziun da la taglia sin il gudogn sulettamain minus d'entradas e na dat nagina schanza a novas interpresas u a novas investiziuns.

Per impedir che las regions perifericas stoppian prender en cumpra minus d'entradas sproporziunads per ellas, pervia dals basegns da las regions da center, proponin nus en

questa consultaziun da surdar a las vischnancas la suveranità fiscal per la taglia sin il gudogn. Tras quai pon ellas fixar independentmain il pe da taglia entaifer ina tscherta dimensiun.

En il dretg vertent n'han las vischnancas nagina suveranità fiscal per la taglia sin il gudogn e sin il chapital. Il chantun incassescha ina taglia sin il gudogn e sin il chapital per quellas vischnancas che han in pe da taglia unitar e trametta vinavant ils retgavs correspundents a las vischnancas che han il dretg da pretender taglia. Il pe da taglia vegn fixà annualmain dal cussegl grond ed importa almain 90 e maximalmain 110 pertschient (art. 3 al. 2 lit. c lescha da taglia per il chantun Grischun, LT; DG 720.000); actualmain sa chatta el tar 95 pertschient.

Da nov duain las vischnancas survegnir ina suveranità fiscal per la taglia sin il gudogn e sin il chapital en la lescha davart las taglias communalas e davart las taglias da baselgia. Questa taglia vegn incassada vinavant tenor las disposiziuns da la lescha chantunala da taglia tras l'administraziun chantunala da taglia. La vischnanca po però fixar senza ed independentmain dal pe da taglia da las personas natiralas, il pe da taglia per la taglia sin il gudogn e sin il chapital. Tuttina sco en il dretg actual duai vegnir mess in tschert rom per quest pe da taglia. La limitaziun vers engiu po impedir ina concorrenza fiscal memia ferma tranter las vischnancas ed in squitsch excessiv da las interpresas localas sin la reduziun dal pe da taglia. La limitaziun vers ensi duai impedir ina grevezza memia gronda da las personas giuridicas.

La fixaziun dal pe da taglia permetta a las vischnancas da definir l'autezza da la taglia sin il gudogn ed er quella da la taglia sin il chapital. Quest fatg sto vegnir resguardà cun determinar il rom che duai vegnir concedì a las vischnancas per fixar il pe da taglia. Cun reducir la tariffa da la taglia sin il gudogn da 5,5 pertschient a 4 pertschient sa reducescha la taglia communal efectiva sin il gudogn per circa 25 pertschient. Quest minus po vegnir cumpensà cun in pe da taglia da 115 pertschient, sch'ils retgavs communal ord la taglia sin il chapital importan circa 45 pertschient dals retgavs da la taglia sin il gudogn, sco che quai è il cas en il chantun.

En questa consultaziun vegn mess en discussiun in pe da taglia tranter 90 e 115 pertschient. Davart il pe da taglia vegnan ins a stuair concluder mintga onn il pli tard il december, il medem mument ch'ins concluda il pe da taglia per la taglia sin las entradas e sin la facultad. Per las personas giuridicas correspunda la perioda fiscal a l'onn da gestiun. Sco en il dretg chantunal vala il pe da taglia a la fin da la perioda fiscal per l'entir onn da gestiun.

4.3 Per las baselgias chantunalas

Tras la taglia da cultus incassescha il chantun ina taglia sin il gudogn e sin il chapital, da la quala il retgav va a favur da las duas baselgias chantunalas. Tenor l'art. 3 al. 2 lit. d LT vegn il pe da taglia fixà dal cussegl grond. El importa almain 9 pertschient e maximalmain 12 pertschient; actualmain sa chatta el tar 10 pertschient.

Questa regulaziun duai vegnir mantegnida. Las duas baselgias chantunalas cumpiglian l'entir chantun e qua na ston vegnir cumpensadas naginas differenzas regiunalas. Las

baselgias chantunales ston purtar il minus d'entradas en la medema dimensiun procentuala sco il chantun. Eventualmain pudess il cussegl grond augmentar il pe da taglia actual da 10 pertschient per 2 pertschient sin il maximum.

5 Realisaziun da prescripziuns federalas en il chantun

Las explicaziuns qua sutvart pertutgan mo puncts, nua ch'ils chantuns han ina libertad d'agir per als realisar. Las disposiziuns obligatorias da la lescha d'armonisaziun da taglia ch'il chantun sto surpigliar talas e qualas, n'èn betg object da questa procedura da consultaziun en il chantun. Per motivs da la cumplettadad vegnan ellas menziunadas sut la cifra 6.

5.1 Retgavs da participaziuns decisivas

Ils retgavs da las personas giuridicas, als quals il pajataglia è participà almain a 10 pertschient, vegnan – en il dretg vertent – suttamess a la taglia federala e chantunala a 60 pertschient (dretgs da participaziun èn facultad privata) resp. a 50 pertschient (dretgs da participaziun èn facultad da fatschenta). Cun questa uschenumnada imposiziun parziala da taglia vulan ins empruvar da cuntanscher l'imposiziun da taglia independenta da la furma giuridica. Quai vul dir ch'ils gudogns che vegnan obtegnids en ina societad anonima e che vegnan pajads ora a l'acziunari duain esser suttamess ad ina grevezza fiscala sumeglianta sco ils gudogns obtegnids en ina interpresa da personas. Il different tractament da facultad privata e da facultad da fatschenta ha dus motivs. Per l'ina è – en la facultad privata – il gudogn liber da taglias tras ina eventuala vendita dals dretgs da participaziun, entant – ch'en la facultad da fatschenta – vegn el registrà sco entradas. Per l'autra vegnan – en la facultad da fatschenta – reducids ils retgavs da participaziun tras ils custs imputabels (custs d'administraziun e da finanziaziun).

Per la taglia federala directa duai l'imposiziun parziala da taglia vegnir augmentada a 70 pertschient. Per ils chantuns prescriba la missiva dal cussegl federal ina imposiziun minimala da taglia da la medema autezza. Il cussegl dals chantuns ha fixà la limita tar 50 pertschient. Uschia na prescriba il dretg federal betg pli in augment per il Grischun.

La grevezza fiscala independenta da la furma giuridica e pia l'autezza da l'imposiziun parziala da taglia dependa essenzialmain da la grevezza fiscala sin il gudogn. En las calculaziuns ston dentant er vegnir integradas las contribuziuns da la AVS, per quant ch'ellas na furman betg la renta, q.v.d. per quant ch'ellas surpassan l'import dad 84 600 francs ed han alura mo pli character fiscal. Cun reducir la tariffa da la taglia sin il gudogn da 5,5 pertschient a 4 pertschient respectivamain la grevezza fiscala efectiva sin il gudogn da 16,12 pertschient a 14,02 pertschient daventa necessaria l'imposiziun parziala da taglia a 70 pertschient. Ella mo gulivescha las consequenzas da l'imposiziun da la taglia sin il gudogn e chaschuna anc adina ina grevezza main ferma tar societads anonimas e tar acziunaris che tar personas cun activitad da gudogn independenta. Questa soluziun ha plinavant l'avantatg d'ina regulaziun unitara en la confederaziun ed en il chantun.

5.2 Taglia sin la facultad per patentas

Tenor l'art. 14 al. 3 sboz LADT pon ils chantuns conceder ina reducziun da la taglia per facultads che pertutgan patentas e dretgs cumparegliabels en la facultad da fatschenta. Da questa pussaivladad duai vegnir profità cun ina reducziun da 50 pertschient. Pervia dal stadi actual da las actas na pon ins betg eruir, en tge autezza che valurs da facultad pon esser pertutgadas da questa reducziun. L'administraziun da taglia parta dentant dal fatg ch'il minus d'entradas po vegnir negligì.

5.3 Patent box

Per entradas ord patentas ed ord dretgs cumparegliabels prevesa la lescha d'armonisaziun da taglia en ils art. 24a e 24b ina imposiziun da taglia reducida. Questa reducziun importa 90 pertschient, po dentant er vegnir fixada pli bassa tras ils chantuns. La Patent box e sia concepziun concreta èn prescrittas obligatoricamain per ils chantuns. Il legislatur chantunal po unicamain fixar l'autezza da la distgargia. Per la taglia federala directa na vegni betg a dar ina Patent box.

Las entradas ord patentas ed ord dretgs sumegliants n'han nagina impurtanza centrala en il chantun. Uschia vegn proponida mo ina reducziun moderada. Cun sbassar la taglia sin il gudogn pon ins cuntanscher en moda pli effizienta ina meglieraziun dal lieu fiscal. La reducziun duai vegnir fixada a 70 pertschient. Quai n'exaurescha betg il rom admess dal dretg federal, ma conceda anc adina ina distgargia fitg gronda.

5.4 Deducziun supplementara da perscrutaziun e svilup

En il dretg vertent pon vegnir activads ils custs da perscrutaziun e svilup e silsunter amortisads u cudeschads directamain sco custs motivads da la fatschenta. Cun la novaziun en l'art. 25a sboz LATD survegnan ils chantuns la pussaivladad d'admetter quests custs ad ina deducziun per maximalmain 150 pertschient. Pertutgant la definiziun da la noziun da perscrutaziun e svilup renviescha la lescha d'armonisaziun da taglia a la lescha federala davart la promoziun da la perscrutaziun e da l'innovaziun (CS [420.1](#)).

Per la procedura da consultaziun vegni partì dal fatg che l'augment da la deducziun actuala na dastgass betg esser d'ina impurtanza centrala per las interpresas grischunas, uschia ch'i duai vegnir desistì da questa deducziun supplementara.

5.5 Deducziun per atgna finanziaziun

Cun l'art. 25a^{bis} sboz LATD ha il cussegl dals chantuns integrà ina nova disposiziun en il project; ina disposiziun che mira sin ils basegns dal chantun Turtig. Chantuns cun ina tariffa da taglia d'almain 13,5 pertschient pon deducir in tschains calculatoric sin l'agen chapital. Ina tariffa da taglia chantunala da 13,5 pertschient correspunda ad ina grevezza fiscala efectiva sin il gudogn da circa 18 pertschient per tut las suveranitads. Questa grevezza vegniss cuntanschida en il Grischun cun ils pes da taglia actuals che cumpiglian ina tariffa da taglia da circa 6,9 pertschient.

Cun sbassar sco vuli la tariffa da la taglia sin il gudogn a 4 pertschient na vegn il Grischun betg a pudair integrar questa deducziun. Ma i n'è betg exclus che la disposiziun vegn extendida en l'ulteriur decurs da la procedura legislativa sin plaun federal. En la procedura da consultaziun è perquai interessant in resun dals circuls economics, particularmain per tge interpresas ch'ina tala deducziun pudess avair ina impurtanza pli gronda.

5.6 Distgargia maximala

Cun il PF17 pon ils chantuns introducir differents instruments che chaschunan distgargias fiscalas. Las consequenzas da questas mesiras duain vegnir limitadas tras l'uschenumnada distgargia maximala tenor l'art. 25b sboz LATD. Tenor quel na dastgan las distgargias da la Patent box, da la deducziun supplementara per perscrutaziun e svilup sco er da la deducziun per atgna finanziaziun betg esser pli autas che 70 pertschient dal gudogn suttaless a la taglia avant questas deducziuns. Ils chantuns pon er fixar ina distgargia maximala pli bassa.

Per la procedura da consultaziun vegn messa en discussiun ina distgargia maximala da 70 pertschient.

5.7 Societads cun status spezial

L'art. 28 al. 2 fin 5 sboz LATD vegn abolì, uschia che las disposiziuns chantunalas davart l'imposiziun da la taglia sin il gudogn da las uschenumnadas societads cun status spezial cuntrafan al dretg federal. Las regulaziuns davart las societads da holding, davart las societads da domicil e davart las societads maschadadas en ils art. 89 fin 89b LT ston pia vegnir abolidas.

Areguard las taglias sin il chapital manca ina regulaziun en il PF17, che sfurzass ils chantuns d'abolir las disposiziuns spezialas dad oz per las societads cun status spezial. Il cussegl federal constatescha en sia missiva en chaussa: "Pervia da l'aboliziun obligatorica da las regulaziuns per las societads cun status spezial stuain nus partir dal fatg ch'ils chantuns aboleschian er las tariffas spezialas da la taglia sin il chapital per questas societads." (missiva tar il PF17, cifra 3.1.2.7, p. 2602). Il cussegl federal è uschia cleramain da l'opiniun che la confederaziun na veglia betg influenzar l'autonomia tariffara dals chantuns e ch'ils chantuns survegnian ina libertad d'agir correspudenta.

En questa consultaziun vegni perquai proponì da mantegnair materialmain la regulaziun legala actuala per la taglia sin il chapital. Il text da lescha (art. 92 LT) sto vegnir rectifitgà areguard il cuntegn, per ch'el na renvieschia betg a disposiziuns che ston vegnir stritgadas.

5.8 Taglia sin il chapital

Tenor l'art. 29 al. 3 sboz LADT pon ils chantuns prevair ina reducziun da la taglia sin il chapital per agen chapital che pertutga dretgs da participaziun sco er patentas e dretgs cumparegliabels. Il cussegl dals chantuns ha cumplettà questa regulaziun ed agiuntà er anc emprests a societads da concern.

Il chantun Grischun posseda oz – en la cumparegliaziun interchantunala – ina taglia sin il chapital fitg auta. Quai deriva istoricamain da l'imposiziun da taglia sin ovras idraulicas. En

questa revisiun da la lescha na po la taglia sin il chapital betg vegnir reducida, perquai che las perditas fissan memia autas per il chantun e per las vischnancas e perquai che las distgargias supplementaras da las personas giuridicas pudessan periclitare il project. Perquai vegnan ins a stuaier examinar, sche – ultra da mantegnair la soluziun speziala per las societads cun status spezial – duai vegnir integrada er ina distgargia tenor la regulaziun LATD menziunada. Questa dumonda duai vegnir approfondada e respundida sin fundament da las posiziuns che vegnan ad entrar durant la procedura da consultaziun. Sch'ina regulaziun correspundenta vegniss integrada, stuess vegnir applitgada ina tariffa da taglia reducida fin a 90 pertschient per l'agen chapital che pertutga participaziuns e.u.v., e quai per restar competitiv sin plaun interchantunal.

5.9 Imposiziun da taglia speziala suenter ch'il status fiscal è crudà davent

Per personas giuridicas che vegnan suttamessas a la taglia en moda privilegiada tenor il dretg vertent, q.v.d. per las uschenumnadas societads cun status spezial, prevesa l'art. 78g sboz LATD ina regulaziun speziala per l'imposiziun da taglia da las reservas zuppadas ch'èn resultadas en il spazi fiscal privilegià. Sche questas reservas zuppadas vegnan realisadas entaifer 5 onns suenter l'entrada en vigur da la revisiun parziala, vegn fatga l'imposiziun da taglia ad ina tariffa da taglia ch'il chantun sto fixar; questa tariffa da taglia duai vegnir fixada sin 0,5 pertschient, e quai sin basa da la regulaziun d'auters chantuns.

5.10 Supplements da famiglia e mesiras da la politica sociala

En il project dal cussegl federal era anc previs l'augment per mintgamai 30 francs da las tariffas minimalas dals supplements per uffants e da scolaziun. En il chantun Grischun avessan questas prescripziuns chaschunà in augment da mo 10 francs. Il cussegl dals chantuns ha stritgà questa disposiziun e tschertga la gulinaziun sur la finanziaziun da la AVS.

Differents chantuns proponan d'augmentar las deducziuns per uffants, las deducziuns per la tgira d'uffants u autras deducziuns. En blers chantuns po il minus d'entradas correspundent vegnir finanzià cun ils retgavs pli auts ord la gulinaziun da las resursas e cun parts pli grondas vi da la taglia federala directa. En il chantun Grischun mancan quests meds finansials supplementars, uschia ch'i sto vegnir desistì da mesiras correspundentas. En quest connex stoi er vegnir punctuà che las deducziuns menziunadas cuntanschan en il chantun Grischun savens gia oz il nivel ch'ins vul obtegnair da nov en auters chantuns.

6 Midadas obligatoricas senza libertads creativas

Cun il PF17 vegnan midadas er disposiziuns da la LATD che ston vegnir surpigliadas en il dretg chantunal senza libertads creativas. En questa consultaziun na vegnan quellas betg messas en discussiun, mabain mo descrittas curtamain.

En l'art. 7a al. 1 lit. b sboz LATD vegn extendida la regulaziun per ils uschenumnads gudogns da transposiziun. Sch'ina persona privata venda ses dretgs da participaziun ad ina persona giuridica ch'ella dominescha, vegn il retgav registrà sco entrada suttamessa a la taglia, per quant ch'el surpassa la valur nominala dals dretgs da participaziun vendids. Tras

quai vulan ins impedir che substrat da distribuziun suttamess a la taglia possa vegnir transformà en agen chapital restituibel senza stuair pajar taglias. En il dretg vertent vegn questa regla applitgada mo, sch'i vegn alienada ina participaziun da 5 pertschient. Questa limitaziun duai vegnir abolida, perquai che la participaziun procentuala na tradescha nagut davart la valur da la participaziun e pia n'è betg in criteri cunvegnent per l'imposiziun da taglia.

En l'art. 7b sboz LATD vul il cussegl dals chantuns limitar la restituziun libra da taglias da las reservas da l'apport da chapital tar societads da chapital quotadas a la bursa e tar associaziuns. La restituziun po esser libra da taglias mo, sch'i vegnan pajadas a medem temp ulteriuras reservas da medema dimensiun, che pon vegnir pajadas tenor il dretg commercial.

Tenor l'art. 24c sboz LATD po ina persona obligada da pajar taglia revelar reservas zuppadas inclusiv la valur augmentada creada sez il cumenzament da l'obligaziun da pajar taglia. Sco cumenzament da l'obligaziun da pajar taglia valan la dischlocaziun da valurs da facultad, interpresas e.u.v. da l'exteriur, la fin d'ina liberaziun da taglia sco er la dischlocaziun da la sedia u da l'administraziun efectiva en Svizra. Las reservas zuppadas reveladas pon silsuent vegnir amortisadas cun effect sin il resultat.

7 Consequenzas finanzialas

7.1 Consequenzas per il chantun

Las consequenzas finanzialas dal project per il chantun han 3 cumponentas:

- minus d'entradas ord la gulivaziun da las resursas confederaziun-chantuns
- entradas supplementaras ord la part pli auta vid la taglia federala directa
- mesiras fiscalas dal chantun

En il dretg vertent han las entradas suttamessas a la taglia da las personas natiralas ed ils gudogns suttamess a la taglia da las personas giuridicas la medema paisa per l'index da resursas da la confederaziun. Cun il PF17 vegnan ad esser sfurzads cunzunt chantuns che han in grond dumber da societads cun status spezial, da sbassar las taglias sin il gudogn, per impedir sche pussaivel che questas interpresas sa tirian davent. Las reducziuns da la taglia chaschunan – pervia da la concorrenza fiscala interchantunala – er en auters chantuns ina reducziun da la taglia sin il gudogn.

Per pudair esser cumpetitiv en la cumparegliaziun internaziunala ed interchantunala, ston ils chantuns fixar las taglias sin il gudogn cleramain pli bassas che la taglia sin las entradas. Quest fatg sto vegnir resguardà cun eruir il potenzial da resursas en la NGF. Quai duai capitar cun in uschenumnà factur zeta, dal qual l'autezza n'è dentant anc betg fixada definitivamain.

La pitschna paisa che vegn dada als gudogns suttamess a la taglia, chaschuna en chantuns sco il Grischun cun in potenzial da resursas relativamain bass dals gudogns en cumparegliaziun cun las entradas, in augment da l'index da resursas ed ina diminuziun correspundenta dals pajaments da gulivaziun. Mendra che la relaziun dals gudogns

suttamess a la taglia cun las entradas suttamessas a la taglia è, e pli negativ che l'effect da la pitschna paisa dals gudogns en la gulivaziun da las resursas è. Tenor las calculaziuns approximativas da la confederaziun è il Grischun pertutgà spezialmain ferm da quest mecanissem. Quel duai avair per consequenza ch'i resulta ina reducziun considerabla dals pajaments da gulivaziun en l'autezza da 24 milliuns francs.

Per finanzia il PF17 en ils chantuns vegn augmentada lur quota vi da la taglia federala directa dad actualmain 17,0 pertschient a da nov 21,2 pertschient. Quest augment chaschuna entradas supplementaras dal chantun da stimads 14 milliuns francs.

L'augment da l'imposiziun parziala da taglia da retgavs da participaziun sin da nov 70 pertschient fa resultar entradas supplementaras da circa 2,5 milliuns francs.

La reducziun da la tariffa da la taglia sin il gudogn da 5,5 pertschient a 4 pertschient chaschuna in minus d'entradas da 14 milliuns francs. Las consequenzas finanzialas dals ulteriurs instruments, cun ils quals il PF17 duai vegnir realisà en il chantun, na pon betg vegnir quantifitgadas. Uschia na po actualmain cunzunt betg vegnir inditgà insatge davart las consequenzas da la Patent box.

Consequenzas finanzialas per il chantun	en milliuns francs
Minus d'entradas ord la gulivaziun da las resursas	- 24 000
Augment da la part vi da la taglia federala directa	+ 14 000
Total da la vart da la confederaziun	- 10 000
Reducziun da la tariffa da la taglia sin il gudogn chantun	- 14 000
Augment da l'imposiziun parziala da taglia chantun	+ 2500
Total da las mesiras chantunals	- 11 500
Total da la confederaziun e dal chantun	- 21 500

Quest minus d'entradas da 21,5 milliuns francs en il resultat total para fitg aut. Da quels derivan 10 milliuns francs da la gulivaziun da finanzas federala en il senn pli vast e na pon betg vegnir influenzads dal chantun. En vista a las fluctuaziuns annualas da las entradas en connex cun la gulivaziun da las resursas ed en connex cun la part vi da la taglia federala directa na para questa perdita betg pli uschè gronda. Las mesiras che pon vegnir influenzadas dal chantun pertutgan in minus d'entradas da per saldo 11,5 milliuns francs. Quest minus d'entradas sto vegnir vis er sut l'aspect da las entradas fiscalas totalas da circa

700 milliuns francs (preventiv 2018). Ellas cumpiglian pia circa 1,6 pertschient dals retgavs da taglia.

Las consequenzas dal PF17 èn resguardadas en il plan da finanzas 2020 fin 2022. Las perditas da rendita ston vegnir finanziadas en las finanzas ordinarias resp. tras respargns tar il chantun. Per garantir che las finanzas publicas pon vegnir tegnidas en equilibr a lunga vista prepara la regenza actualmain in concept general per distgargiar las finanzas. Quest concept cuntegna prescripziuns per elavurar e per realisar mesiras da distgargia concretas sco er revisiuns da leschas che servan ad extender las libertads d'agir dal cussegl grond resp. a reducir obligaziuns d'expensas fixas ch'existan en leschas chantunalas. Quest project vegn promovì parallelamain al PF17. Il PF17 vegn ad augmentar il basegn total da distgargia dal chantun. Il mument na poi betg vegnir inditgà, sche, cura, tge ed en tge dimensiun ch'ins sto prender mesiras da distgargia.

7.2 Consequenzas finanzialas per las vischnancas

Sin plaun da las vischnancas sa fa valair la reducziun da la tariffa da la taglia sin il gudogn. Grazia a la pussaivladad da pudair determinar independentamain il pe da taglia per la taglia sin il gudogn e sin il chapital pon las vischnancas regular independentamain las entradas fiscalas. Ellas ston decider tranter l'attractivitat dal lieu fiscal e la garanzia da las entradas fiscalas actualas. Per quest intent sto vegnir fatga tant in'analisa statica sco er in'analisa dinamica da las personas giuridicas residentes.

L'augment da l'imposiziun parziala da taglia s'effectuescha er sin plaun da las vischnancas. Ma las entradas supplementaras chantunalas ch'èn vegnidas calculadas a 2,5 milliuns francs na dastgassan strusch avair in effect en bleras vischnancas.

Il mecanissem proponì cun il pe da taglia communal chaschuna per l'ina in'autonomia ed ina flexibilitad pli gronda da las vischnancas. Ha però per consequenza, per l'autra, che perditas da taglia – pervia da la reducziun da la tariffa da la taglia sin il gudogn – ston vegnir attribuidas la finala er a la determinaziun dal pe da taglia communal.

Tenor l'art. 196 al. 1^{bis} sboz LTFD resguardan ils chantuns commensuradamain las consequenzas da l'aboliziun da las societads cun status spezial per las vischnancas. Questa disposiziun stat en connex cun l'augment da la part chantunala vi da la taglia federala directa e sa basa sin la consideraziun ch'il chantun laschia participar las vischnancas a quella. Ils chantuns ston decider sezs, co che las grevezas da la refurma pon e duain vegnir repartidas en moda equilibrada entaifer in chantun, e quai sin ils plauns chantunal e communal. Las grevezas dal PF17 ston er vegnir surpigliadas adequatamain da las vischnancas. Tut tenor la constellaziun en in chantun na chaschuna il PF17 dentant naginas contribuziuns finanzialas dal chantun a las vischnancas. Las consequenzas finanzialas dal PF17 na sa reflecteschan er per il chantun Grischun betg mo en ina part pli gronda vi da la taglia federala directa, mabain er en las contribuziuns cleramain reducidas ord la gulivaziun da las resursas. Pervia da tuttas duas posiziuns ensemen obtegna il chantun in minus d'entradas da circa 10 milliuns francs. Uschia mancan ils meds finanzials per indemnisar las vischnancas. Quai è er il motiv, pertge ch'i vegn proponida la soluziun cun il pe da taglia

communal per la taglia sin il gudogn e sin il chapital da las vischnancas. Las vischnancas decidan pia sezzas davart l'autezza da lur perditas da taglia.

7.3 Consequenzas finanzialas per las baselgias chantunalas

Las baselgias chantunalas èn participadas mo vi dals retgavs ord la taglia sin il gudogn e sin il chapital. La reducziun da la taglia sin il gudogn, che chaschuna en il chantun in minus d'entradas da 14 milliuns francs, vegn ad avair per consequenza ch'i resultan perditas da circa 1,56 milliuns francs sin il stgalim da las baselgias chantunalas. Circa 55 pertschient da questa summa pertutga la baselgia chantunala catolica e 45 pertschient la baselgia chantunala reformada. Ina cumpensaziun da quest minus d'entradas tras il chantun n'è betg previsa.

8 Ulteriur proceder e plan da termins

Il plan da termins per la procedura chantunala da legislaziun dependa directamain da las debattas parlamentaras davart il PF17 en l'assemblea federala. Actualmain èsi previs ch'il PF17 vegnia tractà durant la proxima sessiun d'atun 2018 dal cussegl naziunal e che las eventualas differenzas tranter las duas chombras vegnian medemamain regladas durant la sessiun d'atun, uschia ch'il project pudess vegnir deliberà anc en la sessiun d'atun. Sch'i reussiss silsuenter il referendum, stuess la votaziun avair lieu gia il favrer 2019. Actualmain vegni examinà, sche quest stretg plan da termins po vegnir observà.

En il chantun èsi previs da tractar il project en il cussegl grond durant la sessiun d'avust 2019, uschia ch'igl è pussaivel d'al metter en vigur per il 1. da schaner 2020.